

官常典

官常典第一百六十三卷

勳爵部彙考三十五

周二十一 申

周復泰嶽之後于申 按史記齊太公世家太公呂尚者東海上人其先祖嘗爲四嶽佐禹平水土甚有功虞夏之際封于呂或封于申姓姜氏夏商之時申呂或封枝庶子孫或爲庶人

注索隱曰

地理志申在南陽宛縣申伯之國

按路史炎帝戲戲生器器生鉅及伯陵祝庸祝庸爲黃帝司徒居于江水生術囂兌首方顛是襲土壤生條及句龍句龍生垂及信垂生噎鳴是爲伯夷爲虞心呂且功于水封呂生歲十二泰嶽襲呂餘列申許周初復泰嶽後于申暨申伯入卿而楚蝕其壤宣王開元舅申伯于謝

平王遣畿內之民戍申 按詩經王風揚之水不流束薪彼其之子不與我戍申懷哉懷哉曷月予旋歸哉揚之水不流束楚彼其之子不與我戍甫懷哉懷哉曷月予旋歸哉揚之水不流束蒲彼其之子不與我戍許懷哉懷哉曷月予還歸哉

朱

注平王以申國近楚數被侵伐故遣畿內之民戍之



而戍者怨思作此詩也

宣王封申伯于謝 按詩經小雅芄芄黍苗陰雨膏之悠悠南行召伯勞之我任我輦我車我牛我行既集蓋云歸哉我徒我御我師我旅我行既集蓋云歸處肅肅謝功召伯營之烈烈征師召伯成之原隰既平泉流既清召伯有成王心則寧

朱注

宣王封申伯于謝命召穆公往營城邑故將徒役

南行而行者作此

按大雅嵩高維嶽駿極于天維嶽降神生甫及申維申及甫維周之翰四國于蕃四方于宣暨暨申伯王纘之事于邑于謝南國是式王命召伯定申伯之宅登是南邦世執其功王命申伯式是南邦因是謝人以作爾庸王命召伯徹申伯土田王命傅御遷其私人申伯之功召伯是營有俶其城寢廟既成既成藐藐王錫申伯四牡躑躑鉤膺濯濯王遣申伯路車乘馬我圖爾居莫如南土錫爾介圭以作爾寶往近王舅南土是保申伯信邁王饒于郇申伯還南謝于城歸王命召伯徹申伯土疆以峙其糧式遄其行申伯番番既入于謝徒御暉暉周邦咸喜戎有良翰不顯申伯王之元舅文武是憲申伯之德柔惠且直揉此萬邦聞于四國吉甫作誦其詩孔碩其風肆好以贈申伯

朱注

宣王

之舅申伯出封于謝而尹吉甫作詩以送之

莊王九年冬楚伐申 按春秋不書 按左傳莊公六年冬楚文王伐申

景王十六年楚子復申 按春秋不書 按左傳楚之滅蔡也靈王遷許胡沈道房申于荆焉昭公

十三年平王卽位既封陳蔡而皆復之

許

武王封泰嶽後文叔于許 按史記夏本紀帝禹封皐陶之後于英六或在許 注 索隱曰許在潁

川正義曰括地志云許故城在許州許昌縣南三十里本漢許縣故許國也

按路史炎帝戲戲生器器生鉅及伯陵祝庸祝庸爲黃帝司徒居于江水生術嚳兌首方顛是襲土壤生條及句龍句龍生垂及信垂生噎鳴是爲伯夷爲虞心呂且功于水封呂生歲十二泰嶽襲呂餘列申許武王得泰嶽後文叔紹之許靈公徙葉悼公遷城父曰焦夷二十有四世鄭滅之 注 昭

九年書許遷于夷周紀謂武王封之焦非也昭十八年遷析定四年遷容城定六年游吉滅許以許男歸一作斯遽然哀元年許男與楚圍蔡蓋國滅而君在說者以爲復立之也非矣

穆王 年許男朝王于涓上 按穆天子傳天子四日休于濩澤于是射鳥獵獸丁丑天子闕雨

乃至祭父自圃鄭來謁留昆歸玉百枚陵翟致賂良馬百駟歸畢之寶以詰其成陵子闕毛公舉幣玉

見許男于涓上祭父以天子命辭曰去茲羔用玉帛見許男不敢辭還取束帛加璧闕毛公舉幣玉

是日也天子飲許男于涓上天子曰朕非許邦而恤百姓闕也咎氏宴飲毋有禮許男不敢辭升坐

于出尊乃用宴樂天子賜許男駿馬十六許男降再拜稽首乃升平坐及暮天子遣許男歸

桓王九年秋七月壬午齊侯魯侯鄭伯入許 按春秋隱公十一年 按左傳十一年夏公會鄭伯

于邾謀伐許也鄭伯將伐許五月甲辰授兵于太宮公孫闕與潁考叔爭車潁考叔挾輶以走子都

拔棘以逐之及大逵弗及子都怒秋七月公會齊侯鄭伯伐許庚辰傳于許潁考叔取鄭伯之旗螯

弧以先登子都自下射之顛瑕叔盈又以螯弧登周麾而呼曰君登矣鄭師畢登壬午遂入許許莊

公奔衛齊侯以許讓公公曰君謂許不共故從君討之許既伏其罪矣雖君有命寡人弗敢與聞乃

與鄭人鄭伯使許大夫百里奉許叔以居許東偏曰天禍許國鬼神實不逞于許君而假手于我寡

人寡人惟是一二父兄不能共億其敢以許自爲功乎寡人有弟不能和協而使餽其口于四方其



況能久有許乎吾子其奉許叔以撫柔此民也吾將使獲也佐吾子若寡人得沒于地天其以禮悔禍于許無寧茲許公復奉其社稷唯我鄭國之有請謁焉如舊昏媾其能降以相從也無滋他族實偪處此以與我鄭國爭此土也吾子孫其覆亡之不暇而況能禋祀許乎寡人之使吾子處此不唯許國之爲亦聊以固吾圉也乃使公孫獲處許西偏曰凡而器用財賄無寘于許我死乃亟去之吾先君新邑于此王室而旣卑矣周之子孫日失其序夫許太岳之裔也天而旣厭周德矣吾其能與許爭乎

桓王二十三年夏六月許叔入于許 按春秋桓公十五年 按左傳十五年夏六月許叔入于許

注許叔莊公弟也隱十一年鄭使許大夫奉許叔居許東偏鄭莊公旣卒乃入居位許人嘉之以字告也

僖王四年冬十二月齊侯宋公陳侯魯侯衛侯鄭伯許男滑伯滕子同盟于幽 按春秋莊公十六年

惠王十二年夏鄭人侵許 按春秋莊公二十九年

惠王二十一年春正月齊侯宋公陳侯魯侯衛侯鄭伯許男曹伯侵蔡蔡潰遂伐楚夏許男新城薨子業立秋葬許穆公 按春秋僖公四年 按左傳四年春齊侯以諸侯之師侵蔡蔡潰遂伐楚秋

許穆公卒于師葬之以侯禮也凡諸侯薨于朝會加一等死王事加二等于是有以哀斂

惠王二十二年夏齊侯宋公陳侯魯侯衛侯鄭伯許男曹伯會王世子于首止秋八月諸侯盟于首止鄭伯逃歸不盟 按春秋僖公五年 按左傳五年夏會于首止會太子鄭謀寧周也

惠王二十三年夏齊侯宋公陳侯魯侯衛侯曹伯伐鄭圍新城秋楚人圍許諸侯遂救許 按春秋僖公六年 按左傳六年夏諸侯伐鄭以其逃首止之盟故也圍新密鄭所以不時城也秋楚子圍許以救鄭諸侯救許乃還冬蔡穆侯將許僖公以見楚子于武城許男面縛銜璧大夫衰絰士與櫬楚子問諸逢伯對曰昔武王克殷微子啟如是武王親釋其縛受其璧而赦之焚其櫬禮而命之使復其所楚子從之

惠王二十五年春正月王人齊侯宋公魯侯衛侯許男曹伯陳世子款盟于洮鄭伯乞盟 按春秋僖公八年 按左傳七年冬閏月惠王崩襄王惡太叔帶之難懼不立不發喪而告難于齊八年春

盟于洮謀王室也鄭伯乞盟請服也襄王定位而後發喪

襄王元年夏宰周公齊侯宋公魯侯衛侯鄭伯許男曹伯會于葵丘秋九月戊辰諸侯盟于葵丘

按春秋僖公九年 按左傳九年夏會于葵丘尋盟且修好禮也秋齊侯盟諸侯于葵丘

襄王二年夏齊侯許男伐北戎 按春秋僖公十年

注北戎山戎

襄王五年夏齊侯宋公陳侯魯侯衛侯鄭伯許男曹伯會于鹹秋齊仲孫湫致諸侯戍周 按春秋

僖公十三年仲孫湫不書 按左傳十三年夏會于鹹淮夷病杞故且謀王室也秋爲戎難故諸侯

戍周齊仲孫湫致之

襄王八年冬十二月齊侯宋公陳侯魯侯衛侯鄭伯許男邢侯曹伯會于淮 按春秋僖公十六年

按左傳十六年冬十二月會于淮謀鄭且東略也城鄆役人病有夜登丘而呼曰齊有亂不果城而

還

襄王十三年秋宋公楚子陳侯蔡侯鄭伯許男曹伯會于孟執宋公以伐宋冬十二月癸丑諸侯盟

于薄釋宋公 按春秋僖公二十一年 按左傳二十一年春宋人爲鹿上之盟以求諸侯於楚楚



人許之秋諸侯會宋公于孟楚執宋公以伐宋冬會于薄以釋之

襄王十四年夏宋公衛侯許男滕子伐鄭 按春秋僖公二十二年 按左傳二十二年春三月鄭

伯如楚夏宋公伐鄭秋八月楚人伐宋以救鄭冬十一月己巳朔宋公及楚人戰于泓宋師敗績

襄王十九年冬楚人陳侯蔡侯鄭伯許男圍宋十二月甲戌魯侯會諸侯盟于宋 按春秋僖公二

十七年 按左傳二十七年冬楚子及諸侯圍宋宋公孫固如晉告急

襄王二十年夏五月癸丑晉侯齊侯宋公魯侯蔡侯鄭伯衛子莒子盟于踐土冬晉侯齊侯宋公魯

侯蔡侯鄭伯陳子莒子邾子秦人會于溫諸侯圍許 按春秋僖公二十八年 按左傳二十八年

夏四月戊辰晉侯宋公齊國歸父崔天秦小子憇次于城濮楚師背鄢而舍子玉使鬬勃請戰己巳

晉師陳于莘北楚師敗績晉師三日館穀及癸酉而還甲午至于衡雍作王宮于踐土五月丁未獻

楚俘于王癸亥王子虎盟諸侯于王庭要言曰皆獎王室無相害也有渝此盟明神殛之俾隊其師

無克祚國及其元孫無有老幼冬會于溫討不服也丁丑諸侯圍許

注 會溫諸侯也許比再會不

至故因會共伐之

襄王二十五年冬十二月晉人陳人鄭人伐許按春秋僖公三十三年 按左傳三十三年冬十二月晉陳鄭伐許討其貳于楚也

襄王三十年冬十月甲申許男業卒子錫我立按春秋文公五年

襄王三十一年春葬許僖公按春秋文公六年

襄王三十二年秋八月齊侯宋公衛侯陳侯鄭伯許男曹伯會晉趙盾盟于扈按春秋文公七年

按左傳七年秋八月齊侯宋公衛侯陳侯鄭伯許男曹伯會晉趙盾盟于扈晉侯立故也

頃王元年春楚人伐鄭魯公子遂會晉人宋人衛人許人救鄭按春秋文公九年 按左傳九年

三月楚子伐鄭鄭及楚平公子遂會晉趙盾宋華耦衛孔達許大夫救鄭不及楚師

頃王六年夏六月宋公陳侯魯侯衛侯鄭伯許男曹伯晉趙盾同盟于新城按春秋文公十四年

按左傳邾文公元妃齊姜生定公二妃晉姬生捷菑十三年文公卒邾人立定公捷菑奔晉十四年夏六月同盟于新城從于楚者服且謀邾也

匡王元年晉侯宋公衛侯蔡侯鄭伯許男曹伯盟于扈按春秋不書 按左傳文公十五年冬十

一月晉侯宋公衛侯蔡侯鄭伯許男曹伯盟于扈尋新城之盟且謀伐齊也

定王十五年春正月庚子許男錫我卒子甯立 按春秋宣公十七年

定王十八年冬十一月丙申魯侯及楚人秦人宋人陳人衛人鄭人齊人曹人邾人薛人鄆人盟于蜀 按春秋成公二年 按左傳二年冬十一月公及楚公子嬰齊蔡侯許男秦右大夫說宋華元陳公孫寧衛孫良夫鄭公子去疾及齊國之大夫盟于蜀

定王十九年夏鄭公子去疾帥師伐許冬鄭伐許 按春秋成公三年 按左傳許恃楚而不事鄭三年夏鄭子良伐許

定王二十年冬鄭伯伐許 按春秋成公四年 按左傳四年冬十一月鄭公孫申帥師疆許田許人敗諸展陂鄭伯伐許取鉏任洽敦之田晉欒書將中軍荀首佐之士燮佐上軍以救許伐取鄭汜祭楚子反救鄭鄭伯與許男訟焉皇戌攝鄭伯之辭子反不能決也曰君若辱在寡君寡君與其二三臣共聽兩君之所欲成其可知也不然側不足以知二國之成

定王二十一年夏許男愬鄭伯于楚 按春秋不書 按左傳成公五年夏許靈公愬鄭伯于楚六



月鄭悼公如楚訟不勝楚人執皇戌及子國

簡王三年春鄭門于許大獲 按春秋不書 按左傳成公八年春晉侵蔡鄭伯將會晉師門于許

東門大獲焉

簡王四年冬十一月鄭人圍許 按春秋成公九年 按左傳九年秋鄭伯如晉晉人討其貳于楚

也執諸銅鞮冬鄭人圍許示晉不急君也是則公孫申謀之曰我出師以圍許爲將改立君者而紆

晉使晉必歸君

簡王九年秋鄭公子喜帥師伐許 按春秋成公十四年 按左傳十四年秋八月鄭子罕伐許敗

焉戊戌鄭伯復伐許庚子入其郛許人平以叔申之封 注 四年鄭公孫申疆許田許人敗之不得

定其封疆今許以是所封田求和于鄭

簡王十年冬十一月許遷于葉 按春秋成公十五年 按左傳十五年冬十月許靈公畏偃于鄭

請遷于楚辛丑楚公子申遷許于葉

靈王二年冬晉荀營帥師伐許 按春秋襄公三年 按左傳許靈公事楚不會于鷄澤三年冬晉

知武子帥師伐許

靈王十五年夏五月鄭伯晉荀偃魯叔老衛甯殖宋人伐許 按春秋襄公十六年 按左傳十六

年春許男請遷于晉諸侯遂遷許許大夫不可晉人歸諸侯鄭子驕聞將伐許遂相鄭伯以從諸侯之師穆叔從公齊子帥師會晉荀偃夏六月次于楸林庚寅伐許次于函氏晉荀偃欒黶帥師伐楚以報宋揚梁之役楚公子格帥師及晉師戰于湛阪楚師敗績晉師遂侵方城之外復伐許而還

靈王二十三年冬楚子蔡侯陳侯許男伐鄭 按春秋襄公二十四年

靈王二十五年秋八月許男寔薨于楚子買立冬葬許靈公 按春秋襄公二十六年 按左傳二

十六年秋許靈公如楚請伐鄭曰師不興孤不歸矣八月卒于楚楚子曰不伐鄭何以求諸侯冬十月楚子伐鄭鄭人將禦之子產曰晉楚將平諸侯將和楚王是故昧于一來不如使逞而歸乃易成也夫小人之性讐于勇嗇于禍以足其性而求名焉者非國家之利也若何從之子展說不禦寇十二月乙酉入南里墮其城涉于樂氏門于師之梁縣門發獲九人焉涉于汜而歸而後葬許靈公

靈王二十六年夏晉趙武楚屈建魯叔孫豹蔡公孫歸生衛石惡陳孔奐鄭良霄許人曹人會于宋

秋七月辛巳諸侯之大夫盟于宋 按春秋襄公二十七年 按左傳宋向戌善于趙文子又善于

令尹子木欲弭諸侯之兵以爲名二十七年春如晉告趙孟趙孟許之如楚楚亦許之如齊齊人許之告于秦秦亦許之皆告于小國爲會于宋秋七月乙酉宋公及諸侯之大夫盟于蒙門之外

景王元年夏四月許男如楚送葬 按春秋不書 按左傳襄公二十九年夏四月葬楚康王公及

陳侯鄭伯許男送葬至于西門之外諸侯之大夫皆至于墓

景王二年秋鄭良霄出奔許自許入于鄭 按春秋襄公三十年

景王四年春正月晉趙武楚公子圍齊國弱宋向戌魯叔孫豹衛齊惡陳公子招蔡公孫歸生鄭罕虎許人曹人會于虢 按春秋昭公元年 按左傳元年春正月會于虢尋宋之盟也

景王七年夏楚子蔡侯陳侯鄭伯許男徐子滕子頓子胡子沈子小邾子宋世子佐淮夷會于申秋七月楚子蔡侯陳侯許男頓子胡子沈子淮夷伐吳遂滅賴 按春秋昭公四年 按左傳四年夏六月丙午楚子合諸侯于申秋七月楚子以諸侯伐吳八月遂以諸侯滅賴

景王八年冬楚子蔡侯陳侯許男頓子沈子徐人越人伐吳 按春秋昭公五年 按左傳五年冬



十月楚子以諸侯及東夷伐吳以報棘櫟麻之役

景王十二年春許遷于夷

按春秋昭公九年

按左傳二年春二月庚申楚公子棄疾遷許于夷

實城父取州來淮北之田以益之伍舉授許男田然丹遷城父人于陳以夷濮西田益之遷方城外人于許

景王十三年秋九月許人如晉

按春秋不書

按左傳昭公十年秋九月許人如晉葬晉平公

景王十六年楚子復許

按春秋不書

按左傳楚之滅蔡也靈王遷許胡沈道房申于荆焉昭公

十三年平王卽位既封陳蔡而皆復之

景王二十一年冬許遷于白羽

按春秋昭公十八年

按左傳十八年夏五月宋衛陳鄭災陳不

救火許不弔災君子是以知陳許之先亡也楚左尹王子勝言于楚子曰許于鄭仇敵也而居楚地以不禮于鄭晉鄭方睦鄭若伐許而晉助之楚喪地矣君盍遷許許不專于楚鄭方有令政許曰余舊國也鄭曰余俘邑也葉在楚國方城外之蔽也土不可易國不可小許不可俘讎不可啟君其圖之楚子說冬楚子使王子勝遷許于析實白羽

景王二十二年夏五月戊辰許世子止弑其君買冬葬許悼公 按春秋昭公十九年 按左傳十九年夏許悼公瘡五月戊辰飲太子止之藥卒太子奔晉書曰弑其君君子曰盡心力以事君舍藥物可也

敬王元年秋七月戊辰吳敗頓胡沈蔡陳許之師于鷄父胡子髡沈子逞滅獲陳夏齧 按春秋昭公二十三年 按左傳二十三年秋七月吳人伐州來楚遠越帥師及諸侯之師奔命救州來吳人禦諸鍾離子瑕卒楚師燿吳公子光曰諸侯從于楚者衆而皆小國也畏楚而不獲已是以來吾聞之曰作事威克其愛雖小必濟胡沈之君幼而狂陳大夫鬻壯而頑頓與許蔡疾楚政楚令尹死其師燿帥賤多寵政令不壹七國同役而不同心帥賤而不能整無大威命楚可敗也若分師先以犯胡沈與陳必先奔三國敗諸侯之師乃搖心矣諸侯乖亂楚必大奔請先者去備薄威後者敦陳整旅吳子從之戊辰晦戰于鷄父吳子以罪人三千先犯胡沈與陳三國爭之吳爲三軍以繫于後中軍從王光帥右掩餘帥左吳之罪人或奔或止三國亂吳師擊之三國敗獲胡沈之君及陳大夫舍胡沈之囚使奔許與蔡頓曰吾君死矣師譟而從之三國奔楚師大奔

敬王十四年春三月劉子晉侯宋公魯侯蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏會于召陵侵楚夏五月盟于皐鼬 按春秋定公四年 按左傳四年春三月劉文公合諸侯于召陵謀伐楚也

敬王十六年春正月癸亥鄭游速帥師滅許以許男斯歸 按春秋定公六年 按左傳六年春鄭滅許因楚敗也

敬王二十六年春正月楚子陳侯隨侯許男圍蔡 按春秋哀公元年 按左傳元年春楚子圍蔡報柏舉也里而裁廣丈高倍夫屯晝夜九日如子西之素蔡人男女以辨使疆于江汝之間而還蔡於是乎請遷于吳

敬王三十八年夏許男成薨秋葬許元公 按春秋哀公十三年

紀

平王四十九年秋八月紀人伐夷 按春秋不書 按左傳隱公元年秋八月紀人伐夷夷不告故

不書

注 紀國在東莞劇縣